

四庫全書

子部

欽定四庫全書

子部

少室山房筆叢卷二

詳校官中書臣吳璫

員外郎臣牛稔文覆勘

總校官知縣臣繆琪

校對官中書臣李斯咏

謄錄監生臣姜士安

欽定四庫全書

子部十

少室山房筆叢

雜家類六 雜編之屬

提要

臣等謹案少室山房筆叢正集三十二卷續集十六卷明胡應麟撰應麟字元瑞蘭谿人萬厯丙子舉人以依附王世貞得名故明史文苑傳附載世貞傳中此其生平考据雜說也分正續二集為書十六種曰經籍會通四

卷皆論古來藏書存亡聚散之迹曰史書佔  
第六卷皆論史事曰九流緒論三卷皆論子  
部諸家得失曰四部正譌三卷皆攷証古來  
偽書曰三墳補遺二卷專論竹書紀年逸周  
書穆天子傳三種以補三墳之缺曰二酉綴  
遺三卷皆採撫小說家言曰華陽博議二卷  
皆雜述古來博聞強記之事曰莊嶽委談二  
卷皆正俗說之附會曰玉壺遐覽四卷皆論

道書曰雙樹幻鈔三卷皆論內典曰丹鉛新  
錄八卷曰藝林學山八卷則專駁楊慎而作  
其中徵引典籍極為宏富頗以辨博自矜而  
舛訛處多不能免如沈德符敝帚軒輊語摘  
其以我媚為佛經金剛山之非辨婦人弓足  
之前後兩岐王士禎香祖筆記摘其誤以秦  
宜祿妻為呂布妻唐人長安女兒踏春陽一  
絕止據博異志而不引沈亞之為疎漏近時

張文麓螺江日記以為竹書實出于晉太康  
年而應麟以為咸寧反糾楊慎為非是今核  
其所說如經籍會通謂崇文總目但經史有  
所論列子集闕如蓋據六一集所載然六一  
集中亦尚存子部之半非竟闕也又謂廣川  
書跋惟以說經為主自餘諸家僅存卷數蓋  
據書錄解題然書錄解題所言乃廣川藏書  
志非廣川書跋也又謂孟子七篇而漢志十一

篇蓋七字誤分為二然前已引困學紀聞稱  
孟子外篇四篇以四合七非十一而何何隔  
兩頁而自矛盾也又謂先孔子而著書者黃  
帝史孔甲盤盂二十六篇然漢志注明云依  
托何以謂書在孔子前又謂漢志兵家兒  
子一篇書名奇怪然兒古倪字故倪寬史亦  
作兒寬倪子名書亦猶孫子吳子何奇怪之  
有也又云刊板當始于隋引開皇十三年勅

廢像遺經悉令雕板為証然史文乃廢像遺  
經悉令雕造非雕版也史書佔畢大抵掉弄  
筆端無所考証至云世知項橐八歲而師孔  
子不知蒲衣八歲而師堯甘羅十二上卿少  
矣而伯益五歲掌火尤少以小說委談入之  
史論殊為可怪至以曹沫刼盟為葵邱之會  
以素問之雷公為黃帝弟子更不知出何典  
記矣九流緒論謂史佚為墨家之祖不知呂



氏春秋有史角之明文謂隋志不載孔叢不知隋志孔叢七卷在論語類中不在儒家類中謂孔傳續六帖鄭樵通志所無不知傳與樵俱建炎紹興間人同時之書樵安能著錄四部正譌謂憚于自名者魏泰筆錄然東軒筆錄實泰自署名其託名梅堯臣者乃碧雲馥謂衛元嵩元命包襲春秋孝經緯之名然元嵩書名元包不名元命包且春秋有元命

苞苞字從草孝經并無元命包也至謂子華  
子之程本即偽撰者之姓名益無稽矣姑約  
舉其一二尚不止沈德符等之所糾蓋摭撫  
既博又復不自檢點牴牾橫生勢固有所不  
免然明自萬厯以後心學橫流儒風大壞不  
復以稽古為事應麟獨研索舊文叅校疑義  
以成是編雖利鈍互陳而可資考証者亦不少  
朱彝尊稱其不失讀書種子誠公論也楊慎

陳耀文焦竑諸家之後錄此一書猶所謂差  
強人意者矣乾隆四十年六月十二日恭校

上

總纂官臣紀昀 臣陸錫熊 臣孫士毅

總校官 臣陸費墀



欽定四庫全書

少室山房筆叢卷一

明 胡應麟 撰

經籍會通一

墳籍之始肇自羲黃盛於周漢衍於梁晉極於隋唐一  
燼於秦再厄於莽三災於繹四蕩於巢宋氏旁求力  
倍功半元人不緝事軼言湮聚散廢興槩可見矣述  
源流第一

六經刪修尼父授受孔門卷軸篇章類崇簡要三墳邱  
索湮沒不傳以大易尚書較之其體制居可識也蓋  
古文峻潔迥異浮靡聖筆淵玄亡資藻飾故卷之不  
盈篋笥而擴之函冒乾坤春秋而降諸子百家興而  
道術離楚漢以還騷人才士作而文學盛此其盈縮  
之大都也然泰山封禪文字萬家合雒禪通沿洄十  
紀槩徵此例則古人文籍不必盡減今時顧世類弗  
傳者良由洪荒始判楮墨未遑竹簡韋編既非易致

靈文秘檢又率難窺重以祖龍烈焰煨燼之中僅存  
一綫漢世諸儒稍加掇拾劉氏七畧遂至三萬餘卷  
考諸班氏藝文西京制作纔十二三耳世以皋夔稷  
契何書可讀然乎否耶

歷朝諸史志藝文者五家前漢也舊唐也新唐也隋也  
宋也班氏規模七畧劉昫沿襲隋書新唐損益舊唐  
而宋史所因則崇文四庫等目也中壘父子夾葉青  
緗紀例編摩故應邃密第遺書絕寡考訂靡從隋志

簡編亦多散佚而類次可觀論辯多美舊唐之錄本  
朝大為踈畧新書間增所缺頗自精詳歐陽宋志紊  
亂錯雜元人製作亡足深譏大率史氏精神全寓紀  
傳論序次之表志之流便落二義至於經籍尤匪所  
先且人靡博極業謝專門聊具故事而已

自餘正史之外奉命纂修類例足徵卷軸可考若劉歆  
之畧荀勗之部王儉之志孝緒之錄並軼不傳宋自  
慶厯得熙嘉定諸目外薦紳文士宋尤李葉並富青



細今惟文簡目存亦多闕漏鄭氏藝文一畧談括甚鉅剖核彌精良堪省閱第通志前朝失標本代有無多寡混為一途番陽通考以四部分門實因舊史而支流派別條理井然且究極旨歸推明得失百代墳籍燎如指掌倘更因當時所有創及亡篇咸著品題稍存故實則庶幾盡善矣

歷朝墳籍畜聚之多亡如隋世篇目之盛僅見唐時按何歆七畧卷三萬餘班氏東京僅覩其半莽卓之亂

尺簡不存晉荀勗李充存加鳩集宋元嘉中謝靈運  
校讐至六萬卷齊王儉王亮謝朓梁殷鈞任昉阮孝  
緒等繼造目錄率不過三萬卷蓋宋初秘閣所藏重  
複相糅靈運際加哀錄諸人頗事芟除雖其數僅半  
於前或其實反增於舊隋文父子篤尚斯文訪輯蒐  
求不遺餘力名山興壁捆載盈庭嘉則殿書遂至三  
十七萬餘卷書契以來特為浩瀚尋其正本亦止三  
萬七千隋志近九萬卷至開元中累葉承平異書間

出一時纂集及唐學者自著八萬餘卷古今藏書莫  
盛于此趙宋諸帝雅意文墨慶厯間崇文總目所載  
三萬餘卷累朝增益卷不盈萬宣和北狩散亡略盡  
至淳熙嘉定間書目乃得五萬餘卷蓋厯代帝王圖  
籍興廢聚散之由大都具矣夫以萬乘南面之尊石  
渠東觀之富通都大邑之購求故家野老之獻納而  
古今輯錄不過如此蓋後人述作日益繁興則前代  
流傳寢微寢滅增減乘除適得此數理勢之自然也

舊唐書經籍志序云貞觀中令狐德棻魏徵相次為秘書監上言經籍亡逸請行購募并奏引學士校定羣書大備開元三年散騎常侍褚無量馬懷素侍宴言及經籍玄宗曰內庫皆是太宗高宗先代舊書常令宮人主掌所有殘缺未遑補緝篇卷錯亂難於檢閱卿試為朕整比之至七年詔公卿士庶之家所有異書官借繕寫及四部書成上令百官入乾元殿東廊觀之無不駭其廣九年十一月殷踐猷王愜韋述

余欽母熒劉彥貞王灣劉仲等重修成羣書四部錄  
二百卷右散騎常侍元行冲奏上之自後母熒又畧  
為四十卷名為古今書錄大凡五萬一千八百五十  
二卷祿山之亂兩都覆沒乾元舊籍亡散殆盡肅宗  
代宗崇重儒術屢詔購募文宗時鄭覃侍講禁中以  
經籍道喪屢以為言詔令秘閣搜訪遺文四部書至  
五萬六千四百七十二卷及廣明初黃巢干紀尺簡  
無存昭宗即位志弘文雅收合餘燼尚二萬餘遷都

洛陽遂靡子遺右劉昫所紀唐經籍事頗詳以端臨  
通考不載節錄於此

龍城錄云開元文籍最盛至七萬卷當時司典籍者  
學士四十七人張說鄭覃裴煜之侯行果康子玄皆  
與  
焉

太宗初即位即置弘文館聚書二十餘萬卷選天下文  
學之士虞世南褚亮姚思廉歐陽詢蔡允恭蕭德言  
等以本官兼學士更日宿直至夜分乃罷又取三品  
以上子孫充弘文館學生據是時尚未改武德年號

也太宗甫定內難即留意經籍如此而馬氏通考獨  
逸茲事故詳載之按弘文館書至二十萬卷則自隋  
三十七萬外僅再覩耳唐藝文志序稱武德中收隋  
遺書僅八萬餘卷蓋一時裒益之書校其正本當兵  
火勦勦之後決不能過三萬也

此條載資治通鑑陸氏所序通考亦不收

蓋但據經籍考也

文皇初年亦似留意經籍貞觀中魏徵虞世南顏師古  
繼為秘監請購天下書選五品以上子孫工書者繕

寫藏於內庫俾宮人掌之以文皇總之於上虞魏董  
之于下應者宜響應迄貞觀中未聞增益諸臣亦絕  
無目錄之修何也蓋太宗所騁志文詞所鍾嗜翰墨  
於經籍蓋浮慕焉未必如隋宋之竭力蒐訪也故貞  
觀中百事超越前代此反愧焉文思博要至千二百  
卷歐虞又各自有類書而秘府二王之迹獨冠千古  
當時君臣所用力者可見矣

續考新書元行沖傳虞  
魏等竟編緝未成顯慶

中諸員役  
並罷去云



舊唐書志後序云三代之書經秦殆盡漢武帝河間王  
始重儒術於灰燼之餘拾纂亡散篇卷僅而復存劉  
歆七畧在漢藝文志者纔三萬三千九百卷後漢蘭  
臺石室東觀南宮諸儒撰集部帙漸增董卓遷都載  
舟西上因罹寇盜沈之河存者數船而已及魏武父  
子採掇遺亡至晉總括羣書纔二萬七千九百四十  
五卷及永嘉之亂洛都覆沒靡有子遺江表所存官  
書凡三千一十四卷至宋謝靈運造四部書目錄凡

四千五百八十二卷其後王儉復造書目凡一萬八千一十卷齊宋兵火延燒祕閣書籍煨燼梁元帝克平侯景收公私經籍歸於江陵凡七萬餘卷蓋佛老之書雜於其間及周師入郢咸自焚蕩周武保定之中纔盈萬卷平齊所得數止五千及隋氏平陳南北一統祕書監牛弘奏請搜訪遺逸著定書目凡三萬餘卷按此序記累世藏書卷軸多與隋書不同槩當從此為正通考于諸史藝文序目纂輯靡遺獨此不

錄蓋舊唐書或宋少傳端臨所未覩也

通考諸部之首亦但錄  
漢隋新唐俱不及舊唐

雲間陸子淵家多藏書所著別集中有統論一則云自  
古典籍興廢隋牛弘謂仲尼之後凡有五厄大約謂  
秦火為一厄王莽之亂為一厄漢末為一厄永嘉南  
渡為一厄周師入郢為一厄雖然經史具存與孔壁  
汲冢之復出見於劉向父子之所輯畧者為書凡三  
萬三千九十卷孔氏之舊蓋未嘗亡也至隋嘉則殿

乃有書三十七萬卷可謂富矣抑顧言等之所校定才七萬七千餘卷則是重複猥雜張其數耳七畧之外所增才倍之而諸史羣撰具焉南朝盛時梁武之世公私典籍七萬餘卷尚有重本則傳世之書惟存舊數而已散亡之極猶不失萬卷唐世分為四庫開元著錄者五萬三千九百一十五卷魏晉所增與釋老之編雜出其間亦不過三萬餘卷而唐之學者自為之書又二萬八千四百六十九卷自是日有所益

矣安史亂後備加搜採而四庫之書復完黃巢之禍  
兩京蕩然宋建隆初三館有書萬二千餘卷自後削  
平諸國盡收圖籍重以購募太平興國初六庫書籍  
正副本凡八萬卷固半實爾慶厯崇文總目之書三  
萬六百六十九卷較之七畧顧有不及參互乘除所  
亡益者何等書耶洪容齋謂御覽引用一千六百九  
十種書十亡八九而姚鉉所類文集亦多不存因以  
為歎然經史子集之舊宋亦未嘗闕焉宣和訪求一

日之內三詔並下四方奇書由此間出見於著錄者  
溢出二萬五千二百五十四卷以充館閣高宗渡江  
書籍散逸加意訪求淳熙間類次見書凡四萬四千  
四百八十六卷其數雖過於崇文而新籍兼之至於  
紹定之灾而書復闕矣右子淵所紀古今書籍梗槩  
頗為簡明大都本馬氏通考所載而節略之然隋書  
三十七萬柳顧言等除去猥複止得三萬七千見通  
考甚詳而此以為七萬餘卷梁任昉阮孝緒等目錄

大約不過三萬雖云釋典在外要不過二萬餘元帝  
收集煨燼乃得七萬未必無重複也唐志開元書著  
錄者五萬三千九百一十五卷唐學者自為二萬八  
千四百六十九卷共八萬餘陸所言釋老之編雜出  
者三萬餘迄不詳何所指考新舊唐書咸不合宋嘉  
定中續得一萬八千餘卷陸亦未及載也漫識其後  
牛弘所論五厄皆六代前事隋開皇之盛極矣未幾皆  
燼於廣陵唐開元之盛極矣俄頃悉灰於安史肅代

二宗淳加鳩集黃巢之亂復致蕩然宋世圖史一盛  
於慶厯再盛於宣和而金人之禍成矣三盛於淳熙  
四盛於嘉定而元季之師至矣然則書自六朝之後  
復有五厄大業一也天寶二也廣明三也靖康四也  
紹定五也通前為十厄矣

廣陵事見通考葉少蘊所引杜寶  
大業幸江都記此外他無所考

篤而論之則古今書籍盛聚之時大厄之會各有八焉  
春秋也西漢也蕭梁也隋文也開元也太和也慶厯



也淳熙也皆盛聚之時也祖龍也新莽也蕭繹也隋  
煬也安史也黃巢也金人也元季也皆大厄之會也  
東京之季纂輯無聞

班志率西漢東京甚希他無校集者

魏晉之間採

摭未備卓曜諸兇推頽餘燼於聚於厄俱未足云

夫古今墳籍之厄秦固誅首莽即次之蓋秦所焚率三  
代上書西漢稍稍鳩集莽又繼之故靡尺簡也唐之  
厄厄於叛賊宋之厄厄於播遷彼非有意於焚兵燹  
所經玉石俱燬况書宜火物也獨湘東以文士甘心

焉罪浮政矣煬雖雅尚卒以不道禍延薄乎云爾

大抵歷朝墳籍自唐以前槩見隋志宋興而後通考為  
詳第其卷帙之數往往異同緣諸家輯錄或但紀當  
時或通志一代或因仍重複或節略猥凡故劉班接  
迹繁簡頓殊王謝並興多寡懸絕即博洽之流勤於  
論覈而疑似之迹未易精詳今紬繹羣言旁參各代  
推尋事勢考定異同錄其灼然者於左

西漢三萬三千九十卷 劉歆七略總目舊唐書九十

作九百非是據班志所省十家三百餘篇而所增又數十篇僅得後數與此不合然他無可考

東漢一萬三千二百六十九卷 班固藝文志本劉氏

七畧入劉向揚雄等儒術三家

此據原注然尚有杜林并蹴鞠二三家

省伊尹墨子兵類十家

亦據原注然所省又有劉向太史公及淮南王數家

東

漢無增者

晉二萬九千九百四十五卷 荀勗四部總目書不存

見隋志序舊唐書作二萬七千九百四十五卷

東晉三十一十四卷 李充校定止此惠懷之亂故也

東晉孝武增益三萬餘卷 徐廣校定見崇文總目序

宋萬四千五百八十二卷 謝靈運所校隋志以為六

萬按六代間書尚難得晉渡江才得三千孝武時三

萬恐亦重複宋初何遜能爾當以舊唐書為正阮氏

七錄數同

齊萬五千七十四卷 至王儉校修隋志作一萬五千

七百四卷

阮作宋元徽目與舊書齊目正同

齊永明增益一萬八千一十卷 謝朓王亮修諸家皆

全

梁二萬三千一百六卷 任昉部集凡釋氏書不與

梁晉通增集三萬餘卷 阮孝緒七錄總目蓋梁世薦

紳家藏併在其中秘書則或因任昉之舊然釋道二  
典並存其間則所增亦才數千而梁世之書盡此矣

此據隋志按阮本錄四萬四千五百二十  
六卷釋道與焉然亦非七萬也見弘明集

隋初一萬五千餘卷 見牛弘進書表此時合正副本

僅三萬餘湘東煨燼所存并平陳所得也

隋大業中三萬七千餘卷 柳詒等校定總三十七萬  
卷正本進御僅此然隋志總目八萬九千餘卷蓋柳  
氏校定之後或有所增或唐諸人據前代舊目芟除  
猥雜會為此編也諸史藝文皆草草惟隋志盛欲備  
一家言追劉王阮氏諸書序意可見大都

唐開元中八萬二千三百八十四卷 新唐書序總舊  
唐書止五萬六千四百七十六卷蓋釋道二家不與

及唐人自著不全入也

唐開成中五萬六千四百七十六卷 舊唐志序所載

是時搜錄未必如前之盛蓋釋道本朝具錄矣

宋慶厯中三萬六千六百六十九卷 王堯臣崇文總目後

屢增至四萬餘卷

宋淳熙中四萬四千四百八十六卷 陳騏等四庫書

目後屢增益至五萬九千餘卷

考諸史藝文志往往與當時書目相左隋三萬七千而志

八萬九千六百六十六卷唐八萬二千而舊唐後序  
十二萬五千九百六卷宋崇文目四萬中興目五萬而  
史十一萬九千九百七十二卷蓋史或會萃一代志但  
紀錄一時故不無異同而宋史則深可疑也

前代書但計卷帙重複未分者隋嘉則殿三十七萬唐  
弘文館二十萬開元中一十二萬唐武德初宋興國  
初各八萬梁湘東王所收者七萬宋謝康樂所校者  
六萬薦紳先生惟葉少蘊稱十萬餘則皆為實錄矣



古今書籍人知其厄於火而不知其厄於水者二焉隋  
嘉則殿書寇亂亡軼武德初尚八萬卷王世充平命  
司農少卿宋遵貴以舟載之行經砥柱漂沒風浪十  
僅二三見隋志及舊唐書經籍志后序俱云存者無  
幾新唐志以盡亡其書蓋信筆不考之過也次則漢  
蘭臺石室諸書董卓遷都載舟西上因罹寇盜沈  
溺河中僅數船存此一事他書不載獨舊唐經籍志  
後序記此考光武遷都書籍二千餘兩諸家以為三

倍于前固非實錄而時無纂輯尺簡不傳惜哉

凡前代書籍之厄史皆備書獨隋世篇籍最盛而諸志  
不言所終考隋世諸書咸在東都煬幸廣陵東都守  
禦獨完自王世充降唐唐盡收其圖史僅八萬卷中  
間未嘗被火何之藏蓄之盛竟何在耶惟杜寶大業  
江都記云隋書籍三十七萬悉焚於廣陵當是實錄  
蓋隋煬酷嗜經典既欲徙都廣陵必盡載諸書自從  
洛陽八萬意當時副本耳宋書籍紹定間復災所存

者尚衆德祐航海蒙古之難又蕩然矣觀此則圖籍  
廢興大槩關係國家氣運豈小小哉

世共傳劉氏七畧王儉七志阮孝緒七錄荀謝任殷四  
部外諸史藝文所載又有晉義熙已來新舊目錄三  
卷梁天監六年四部書目四卷梁東宮四部目錄四  
卷梁文德殿四部目錄四卷陳天嘉六年壽安殿四  
部目錄四卷陳德教殿四部目錄四卷陳承香殿五  
經史記目錄二卷隋開皇四年四部目錄四卷開皇

八年四部目錄四卷開皇二十年書目四卷香廚四  
部目錄四卷隋大業正御書目錄九卷唐羣書四錄  
二百卷古今書目四十卷唐集賢書目一卷唐四庫  
搜訪圖書目一卷開元四庫書目四十卷唐秘閣書  
目四卷偽蜀王建書目一卷紫微樓書目一卷崇文  
總目六十六卷秘閣四庫書目十卷史館書目二卷  
太學書目一卷據此則前代目錄甚多不止盛唐一  
二今並不傳然前史所載惟謝王任阮諸錄尚存全

數其餘多寡槩不可得詳矣

前代懸購遺書咸著條目隋有闕書目唐有訪書錄宋有求書錄異時人主留意若此隋文父子所以能致三十七萬於一時者蓋民間獻書無所不納也

書目第記書名卷軸槩不能廣唐羣書四錄乃至二百餘卷何以浩繁若此蓋各書之下必有論列若歆何所編者宋王堯臣總目六十六卷亦然然但經史二部子集則闕如也董道廣川書跋則又特主說經而

已自餘諸家僅存卷數尤氏書目則并卷數不存文簡在宋頗負博洽稱疎畧乃爾或陶氏說邪所節也唐毋甕有古今書錄四十卷又節畧羣書四錄而成即體製居然可見惜並不存鄭略有劉歆七畧七卷又七畧別錄二十卷豈七卷者目別錄乃論列與

累朝中秘所畜外薦紳文獻名藏書家代有其人漢則劉向桓譚晉則張華東晉齊則王儉陸澄梁則任昉沈約唐則李泌蘇弁皆灼灼者自餘尚衆而世不甚

稱宋則李淑宋綬尤表董道葉夢得晁公武等大  
率人間所藏卷軸不過三萬若任昉四萬極矣宋又  
有濡須秦氏莆田鄭氏漳南吳氏荊州田氏並著目  
錄盛於前朝蓋由印本易得故儲畜者多其數故不  
能溢也通志有吳兢西齋杜信東齋等目則唐世非  
無編錄但不存爾

通志又蔣或目錄都氏目錄各一卷亦當唐人又李正議沈少卿吳

良嗣李衛公歐陽參政俱有目錄則皆宋人也

葉少蘊云本朝公卿名藏書家如宋宣獻李邯鄲四方

士民如亳州祁氏饒州吳氏荊州田氏等吾皆見其  
目多止四萬餘卷其間頗有不必觀者惟宋宣獻家  
擇之甚精止二萬許卷而校讐詳審皆勝諸家吾舊  
所藏僅與宋氏等而宋氏好書人所未見者吾不能  
盡得也按葉所紀諸家俱有書目行世載文獻通考  
今並不存觀此梗槩可見其論諸家所藏多猥雜不  
務銓擇切中厯朝館閣之病不特宋世而已餘語咸  
實錄錄之



揮麈錄云承平士大夫藏書如南都戚氏厯陽沈氏廬  
山李氏九江陳氏鄱陽吳氏俱有名當世今皆散逸  
近所至郡府多藏文籍且易得本傳錄仕宦稍顯者家  
必有書數千卷然多失於讐校也按此則葉氏論列  
外又有此五家宋時大獻之盛乃爾揮麈錄又云葉  
少蘊少年貴盛平生好收書逾十萬卷置雪川山居  
建書樓以處之極為華煥丁卯年其宅與書俱蕩一  
燎李泰發家舊有萬餘卷亦以是歲火豈厄運所遭

耶

廬山李氏即子瞻作記者藏書僅九十卷  
則餘所列未必皆書家倚頓惟葉語可憑

唐馮贄雲仙散錄序稱家藏九世之書二十餘萬卷按  
唐時雕本甚稀故蘇弁家藏二萬侔於秘閣開元之  
盛僅八萬卷文皇二十萬卷自是重複然唐時即重  
複之書亦不易得贄何人乃能有此世稱雲仙多誕  
此開卷一大噓也

宋元世欲致此即不為難然必不  
計重複乃可若正本雖三萬而下

可易得乎唐世士民  
藏書迄無過三萬者

玉堂逢辰錄云祥符八年四月崇王宮火一日二夜所焚屋宇二千餘間三館圖籍一時俱盡大風或飄至汴水之南惟演獻禮賢宅以處諸王陳振孫曰唐末五代書籍之僅存者又厄於此火可為太息也

魏了翁跋遂初堂書目云江元叔合江南吳越之藏凡數萬卷為藏僕竊去市人裂之以藉物其入於安陸張氏者傳之未幾一篋之畜僅供一炊王文康李文正廬山劉莊與南陽井氏皆藏書者俱未久而失之

宋宣獻兼有畢文簡楊文莊二家之書不減中秘而  
元符中蕩為煙埃晁文元累世所藏自中原無事時  
已有火厄至政和甲午之災尺素不存斯理也殆有  
不可曉者按此記宋世諸藏書家尤詳而皆不能久  
有良足慨也

齊東野語云世間凡萬物未有聚而不散者而書為甚  
隋牛弘疏請開獻書之路極論廢興述五厄之說則  
書之厄也久矣今姑撫其槩言之梁元帝江陵蓄古

今圖書十四萬卷隋嘉則殿書三十七萬卷唐惟貞  
觀開元最勝兩都各聚書四部至七萬卷宋宣和殿  
太清樓龍圖閣御府所儲尤盛於前代今可考者崇  
文總目四十六類三萬六百六十九卷史館一萬五  
千餘卷予不能具數南渡以來復加集錄館閣書目  
五十二類四萬四千四百八十六卷續目一萬四千  
九百餘卷是皆藏於官府耳若士大夫之家所藏在  
前世如張華載書三十車杜兼聚書萬卷韋述蓄

書二萬卷鄴侯挿架三萬卷金樓子聚書八萬卷唐  
吳兢西齋一萬三千四百餘卷宋承平時如南都戚  
氏厯陽沈氏廬山李氏九江陳氏鄱陽吳氏王文康  
李文正宋宣獻晁以道劉莊興皆號藏書之富邯鄲  
李淑五十七類二萬三千一百八十餘卷田錫三萬  
卷昭德晁氏二萬四千五百卷南都王仲至四萬三  
千餘卷而類書浩博若太平御覽之類復不與焉次  
如曾南豐及李氏山房亦皆一二萬卷然鮮有不厄

於兵火者至若吾鄉故家如石林葉氏賀氏皆號藏書之多至十萬卷其後齊齋倪氏月河莫氏竹齋沈氏程氏賀氏皆號藏書之家各不下數萬餘卷亦皆散失無餘近年惟直齋陳氏書最多蓋嘗仕於莆傳錄夾漈鄭氏方氏林氏吳氏舊書至五萬一千一百八十餘卷且倣讀書志作解題極其精詳近亦散失至如秀巖東窓鳳山三李高氏牟氏皆蜀人號為史家所藏僻書尤多今亦已無餘矣吾家三世積累先

君子酷嗜至鬻負郭之田以供筆札之用冥搜極討  
不憚勞費凡有書四萬二千餘卷及三代以來金石  
之刻一千五百餘種度置書種志雅二堂日事校讐  
居然贏金之富余小子遭時多故不善保藏善和之  
書一旦掃地因考今昔有感斯文為之流涕因書以  
識吾過且以示子孫云右周密所紀宋諸藏書家最  
為詳盡續考得之因全錄以見宋世民間文獻遠過  
漢唐總之板本易得故也昭德晁氏直齋陳氏即通



攷所引二家而不及載其總目僅此足徵云

豫章漫抄云元至正初史館遣屬官馳驛求書東南異書頗出時有蜀帥紐鄰之孫盡出其家貲遍遊江南四五年間得書三十萬卷邈峽歸蜀可謂富矣今江西與江南號稱文獻故邦予來訪之藏書甚少間有一二往往新自北方載至亦無甚奇書而浙中猶為彼善若吾吳中則有羣集有精美者矣按此及端臨通考序則元世亦嘗屢有求書之詔第一代典籍邈然

無聞何也子淵謂越中視江右差善蓋子淵於越中未嘗久寓且世變陵谷或當時頗異於今故耳若精美則今猶最吳中也其謂江右書皆自北方攜至都

下昔固多書矣

陶宗儀說郛錄雜談數百家今傳僅十二三則宋世書勝國尚多于今然

古書出于今者元未必盡有也

隋文父子以天下之力收書僅三十七萬遂冠古今元邊帥子蟠一家之產驟得三十萬卷亦宇宙奇事然但欲其多而不計重複則在今甚不難顧正本不知

幾何耳古今書籍統計一代前後之藏往往無過十萬統計一朝公私之蓄往往不能十萬所謂天之生財止有此數也況元時板本尚希又非文明之世紐氏子三十萬卷芟其重複政恐不能三萬耳

按唐以前藏書之籍惟史志中得諸秘閣者可徵自餘民間薦紳所儲槩不可攷如漢梁子初楊子林手錄

萬卷梁任昉四萬唐蘇弁二萬李泌三萬

梁楊二氏並見桓譚

新論今載困學紀聞紀聞又云鄴侯之書乃其父所蓄非泌始有之皆僅存總目獨阮

孝緒之四萬類例足徵然非必家藏也宋世藏書家至衆目率不存尤延之遂初堂目今傳余閱之亦多不備推之宋葉諸家當亦爾爾惟晁陳二氏最有條理可觀陳所藏至五萬餘足為宋世藏書第一家據野語乃宦中盡得五姓之書故能至是豈易易哉

濮安懿王之子宗綽蓄書七萬卷始與英宗偕學於邸每得異書必轉以相付宗綽家本有岳陽記者皆所賜也此國史本傳所載宣和中其子淮安郡王仲縻

進目錄三卷忠宣公在燕得其中帙云除監本外寫本印本書籍計二萬二千八百三十六卷觀一帙之目如是所謂七萬卷者為不誣矣三館秘府所未有也盛哉右見洪景廬隨筆第宋世三館所藏不過四萬以上況英宗時尚在宋初其時板本未盛即重複通計亦未能遽至此隨筆所計謬無疑

輟耕錄云莊蓼塘住松江府上海縣青龍鎮嘗為宋秘書小史其家蓄書數萬卷且多手鈔者經史子集山

經地志醫卜方伎稗官小說靡所不具書目以甲乙  
分十門蓼塘既沒子孫不知保惜或為蟲鼠蝕齧或  
為鄰識盜竊或供飲博之需或應糊覆之用編帙散  
亂所存無幾至正六年朝廷開局脩宋遼金三史詔  
求遺書有以書獻者予一官江南藏書多者止三家  
莊其一也繼命某學士一人選取其家其家恐兵遁  
圖識干犯禁條悉付祝融氏及收拾燼餘存者又無  
幾矣其孫羣玉悉載入京覬領恩澤宿留日久仍布

衣歸書之不幸如此按元世諸藏書家傳記罕載據  
陶所稱江南藏書三家其二不著姓氏惜亡從考其  
何人然莊氏既沒後人隨復失之古今藏書同一慨  
也

馬端臨文獻通考經籍類甚詳覈必富於家藏廷鸞傳  
未不著端臨固以其入元故乃元史亦不為立傳以  
若人撰述之勤有功千古泯沒若斯良可扼腕然此  
書自足永久何藉史臣也

凡書籍時代近者勢易流傳而人多棄擲時代遠者迹多湮沒而世罕珍藏然夷考昔人書目參以余所校讐往往漢多於周唐多於漢而宋多於唐何耶周尚韋編漢始側理唐猶傳錄宋則印摹難易之辨也其詳具末卷中

少室山房筆叢卷一



欽定四庫全書

少室山房筆叢卷二

明 胡應麟 撰

經籍會通二

經史子集區分為四九流百氏咸類附焉一定之體也  
第時代盛衰製作繁簡分門建例往往各殊唐宋以  
還始定於一今稍掇拾諸家撮其大畧以著於篇述  
類例第二

夏商以前經即史也尚書春秋是已至漢而人不任經  
矣于是乎作史繼之魏晉其業浸微而其書浸盛史  
遂析而別於經而經之名禪於佛老矣周秦之際予  
即集也孟軻荀況是已至漢而人不專予矣於是乎  
有集繼之唐宋其體愈備而其製愈繁予遂析而  
入於集而予之體夷於詩騷矣

尚書經之史也春秋史之經也中庸孟氏子也而其理  
經故陟而經也道德沖虛經也而其理子故降而子

也三者皆可以互名惟其實也集則迥不同矣

史之體遠矣董狐南史其人也晉乘楚檮杌其撰也然

而弗傳焉春秋之前左國

國語國策

三家而已集之名昉

于楚乎屈宋唐景皆楚也非騷賦無以有集

屢朝書目若謝客王亮謝朓任昉諸人史但言纂修而不錄其類例其大數尚存也至李充殷鈞祖暉蕭繹輩則并其卷數皆不得而知矣惟劉氏七畧大槩存漢書中荀勗王儉阮孝緒類例並載諸史差可考焉

觀其類例而四部之盛衰始末亦可以槩見矣

劉歆七畧一曰六藝一曰諸子一曰詩賦一曰兵書一  
曰術數一曰方伎而首之輯畧以總集諸書之要則  
分列品題實六畧耳班固藝文志增入五家而省其  
十家共三十八種五百九十六家萬三千二百六十  
九卷歆原數三萬三千九十卷固節其猥冗僅得十  
之三四大槩新莽之亂焚軼之餘故也然七畧原書  
二十卷班氏藝文僅一卷者固但存其目耳何歆每

校一書則撮其指意錄而奏之近世所傳列禦寇戰國策皆何題辭餘可概見因以論奏之言附載各書之下若馬氏通考之類以故篇帙頗繁惜今漫無所考詳其義例六藝經也諸子兵書術數方伎四畧皆子也詩賦一略則集之名所由昉而司馬氏書尚附春秋之末此時史籍甚微未足成類也

鄭以史記不當入經蓋未

深考此耳

王儉七志一經典二諸子三文翰四軍書五陰陽六術

藝七圖譜前六志成本劉氏六畧但易其名而益以圖譜及佛道二家名雖曰七實九志也然非述作者之意但於書名之下每立一傳而又作九篇條例編於卷首盖亦輯略之意按經不曰六藝而曰經典則史固漸備矣隋志謂其文義淺近遠非歆向倫余謂儉齊相佐命百事填委故無暇此浮剽其名耳

阮孝緒七錄一經典二紀傳三子兵四文集五伎術六佛七道又本王氏而加紀傳并諸子兵書為子兵陰

陽術藝為伎術又益以佛道二家史書至是漸盛與經子並列而佛道二家之言大行中國矣

書之分四部也實魏荀勗始之一曰甲部紀六藝小學等書一曰乙部紀諸子兵術等書一曰丙部紀史記皇覽等書一曰丁部紀詩賦圖讚等書此時史集二部尚希故王阮二目更從劉氏分七類至唐大盛於是史居子上次經佛老附子次史而終之以集定為四部宋氏以還遞相沿襲而作者之

意未有所明馬氏始倣劉向前規論其大旨體製  
駸駸備矣

馬懷素傳云開元中秘書省典籍散落條流無叙懷素  
上疏曰南齊以前墳典舊編王儉七志已後著述其  
數盈多隋志所書亦未詳悉或古書近出前志闕而  
未編或近人相傳浮詞鄙而猶記若無編錄難辨淄  
澠望括檢近書篇目并前志所遺續王儉七志藏之  
秘府上於是召涉學之士尹知章等分部撰錄又褚



無量傳云無量以舊庫內書自高宗代即藏在宮中  
漸致遺逸奏請繕寫刊校以弘經籍之道玄宗令於  
東都乾元殿前施架排次引公卿已下入殿前令縱  
觀焉開元六年駕還又勅無量於麗正殿以續成前  
功又元行沖傳云秘書監馬懷素集學者續王儉七  
志右散騎常侍褚無量於麗正殿校寫四部書事未  
就而懷素無量卒詔行沖總代其職於是行沖表請  
通撰古今書目名為羣書四錄命學士毋嬰韋述殷

踐猷余欽等分部修檢歲餘書成奏上之右三則俱  
舊唐書通考所未載夫以一目錄之微更三賢之手  
積十載之勤始就豈易易哉

其類例諸傳不載考唐藝文  
志皆以經史子集為次云

前史所述魏晉諸家書目條流僅舉銓次靡詳惟阮氏  
七錄始末備載弘明集中余覩其分門創義損益前  
規綜挾之功勤且力矣隋唐志率沿此因節錄之

經典錄一易二書

三

詩

四

禮

五

樂

六

春秋

七

論語

八

孝

經九小學

凡四千七百一十卷

紀傳錄一

國史二

注歷三

舊事

四職官

五

儀典六

法制七

偽史八

雜傳九

鬼神十

土

地一譜狀

十

簿錄

凡一萬四千八百八十八卷

子兵錄一

儒二

道

三陰陽

四

法五

名六

墨七

縱橫八

雜九

農家十

小說

一十兵家

凡三千八百九十四卷

文集錄一

楚辭二

別集三

總集

四雜文

凡萬七百五十五卷

伎術錄一

天文二

緯識三

歷算四

五行

五

卜筮六

雜占七

刑法八

醫經九

經方十

雜藝

凡三千七百五十六卷

佛法錄一

戒律二

禪定三

智慧四

疑似

五論記

凡五百四十卷

仙道錄

一經戒

服餌

三房中

符

圖

凡一千一百三十八卷

右分類大槩與通考合惟析伎術置四部外而兵家尚

半諸子蓋秦漢軍書最盛故劉王特列兵家而術數

方伎條流繁衍至析為二梁世稍減因以子兵同條

伎術共貫唐宋以後益微遂皆統于子矣

隋唐宋志具諸史中

不詳錄

宋世諸家雖咸有書目載於文獻通考其類例悉不能

詳即通考亦第據晁陳二志未必盡自端臨也惟邯鄲之李莆田之鄭二家類例大畧可考并識下方李淑獻臣邯鄲圖書志載其家所藏圖書五十七類經史子集通計一千八百三十六部二萬三千三百八十六卷其外又有藝術志道書志書志畫志通為八目十卷號圖書十志按李氏類例於四部之外更列四目亦阮氏外篇之意然書畫一類分為二門有道書而無釋典不可曉也

鄭氏書目七卷莆田鄭寅子敬列所藏書為七錄曰經  
曰史曰子曰藝曰方伎曰文曰類按唐以後不分四  
部而仍七錄之名惟鄭氏一家然伎術阮氏已合而  
鄭仍分之大率李鄭二家但據所藏多寡為類不求

合前人也

宋公垂葉少蘊並篤好而無書目蓋皆聚而弗讀葉于經學最精博此外未聞

尤延之遂初堂書目凡經九類史十八類子十二類集  
六類今全載陶宗儀說郭晁陳馬氏三家義例大抵  
同此第尤時失之疎而三家較精密耳晁讀書志陳

書錄解題並全載馬通考中持論各有可觀

鄭漁仲藝文畧凡十二類一經類九家八十八種二禮類七家五十四種三樂類十一種四小學十二種五史類十三家九十種六諸子十一家四十八種七星數三家十五種八五行三十家三十三種九藝術一家十七種十醫方一家二十六種十一類書一家二種十二文三家六十六種共一百家四百六十二種一十二萬餘卷按鄭之析類頗極苦心第自唐以後

四部卷數相當總之經史子集而細分之乃為得體  
今藝術等書僅數百卷亦為一類可乎

馬氏經籍考經史子集仍分四部經十二類一易二書  
三詩四禮五春秋六論語七孟子八孝經九樂十識  
緯十一儀注十二小學史十三類一正史二編年三  
起居注四雜史五傳記六故事七職官八地理九刑  
法十時令十一譜錄十二史鈔十三史評子二十  
類一儒家二道家三法家四名家五墨家六縱橫家



七雜家八小說家九農家十天文家十一歷算家十二五行十三占筮十四刑法十五兵書十六醫家十七神仙十八佛家十九類書二十雜藝集四類一別集二詩集三歌集四總集

陸文裕藏書目序云余家學時喜收書然覩覩屑屑不能舉羣有也壯遊兩都多見載籍然限於力不能舉羣聚也間有殘本不售者往往廉取之故余之書多斷闕闕少者或手自補綴多者幸他日之偶完而未

可知也正德戊辰夏六月寓安福里宿痾新起命僮  
出曝既乃次第於寓樓數年之積與一時長老朋舊  
所遺歷歷在目顧而樂焉余四方人也又慮放失是  
故錄而存之各繫所得倘后益焉將以類續入耳深  
識

夫書莫尚於經經聖人之書也後有作焉凡切於經咸  
得附矣故錄經第一理性之書倡於宋而盛之然經  
之流亞也故錄理性第二語曰經載道史載事故錄

史第三書作於經史間而非經史可附者槩曰古書  
故錄古書第四聖轍既逝諸子競馳故錄諸子第五  
質漸趨華而文集興焉故錄文集第六四詩既刪體  
裁益衍按厥世代考高下焉故錄詩集第七山包海  
滙各適厥用然妍媸錯焉類書之謂也故錄類書第  
八紀見聞次時事而掌不在官通謂之史可也故錄  
雜史第九山經地志具險易叙貢賦寓王政矣故錄  
諸志第十聲音之道與天地通而禮樂所由出也故

錄韻書第十一不幼教者不懋成不早醫者不速起  
其道一也故錄小學醫藥第十二方藝伎術故有成  
書者孔子曰雖小道必有可觀者焉故錄雜流第十  
三聖作物觀一代彰矣宣聖從周遵一統故也特為  
一錄以次宸章令甲示不敢瀆云目曰制書

陸所類書諸家畧備惟不及二典豈類置諸子中耶  
考文裕目雜史尚別正史決不以二典置諸子中或  
此時尚未  
得故也

按子淵之目亦以經史子集為次而特尊本朝聖製分

門另叙亦似合宜但宋世理性之書自有儒術類列  
於子家諸志皆史也雜技皆子也韻書即經也似不  
應更為類小學即韻類也醫學即伎類也二者絕不  
相蒙尤不應混列一塗惜余生晚不獲起前輩而質  
之惟類書另錄最當與余山房書目同

子淵別錄古書不過三墳汲冢之流當析而附之經史  
子下真者以作之時為次偽者以出之時為次似不  
必別類也余生平好鳩集經子而限於力收殘掇軼

大類於淵序中所云文裕貴人也且猶若是況余寒士哉然良工苦心非同好不易識也

陰符之文高簡非先秦漢人莫能為也三墳之文淺陋非晚唐宋人莫能為也鄭氏以三墳列六籍之首固大可笑諸家以陰符李筌出之而列於唐則亦不詳其體矣况陰符言或類兵或類道三墳體或類易或類書尤難定例余意欲取此類及緯候等書元倉鵬冠等子總為偽書一類另附四部之末亦千古經籍家

一快第前人絕無此目恐好古之士或不免於顧惜耳逸周書穆天子等雖多誇誕然文字殊古且未嘗

有所依託自當入傳注中

穆傳舊列起居注中

凡著述最忌成心成心著於胸中則顛倒是非雖丘山之鉅目睫之近有蔽不自知者鄭漁仲平生不喜班固其論已過不已則訾其古今人表可矣至謂其胸中全無倫類不當取揚雄太玄法言樂箴三書總列儒家余考固藝文志雄之前劉向六十七篇則七畧

舊目也下注新序世說說苑列女傳四家亦不分析  
固正沿其舊耳乃以固步趨劉氏尚可攬入七畧所  
無便失之然則何書新序說苑子類也世說列女史  
類也必訾其失當歸於歆固何與耶

凡經籍緣起皆至簡也而其卒歸於至繁經解昉自毛  
韓馬融鄭玄浸盛至梁武三禮質疑一千卷極矣編  
年昉自春秋荀悅袁宏浸盛至李燾長編一千六十  
三卷極矣世史昉自尚書司馬班固浸盛至托克托宋



史五百卷極矣實錄昉自周穆魏晉浸盛至開元起  
居注三千六百八十二卷極矣譜牒昉自世本梁唐  
浸盛至王僧孺十八州譜七百十二卷極矣地志昉  
自山海陸澄任昉浸盛至蕭德言等五百五十五卷  
極矣字學昉自三倉許慎周研浸盛至顏真卿字海  
鏡源三百六十五卷極矣字法昉自四體晉衛恒撰  
周越袁昂浸盛至唐文皇晉人書蹟一千五百一十  
卷極矣方書昉自張機葛洪褚澄浸盛至隋煬帝類

聚方二千六百卷極矣文選昉自摯虞孔逭虞綽浸  
盛至許敬宗文館詞林一千卷極矣文集昉自屈原  
蕭衍沈約浸盛至樊宗師總集二百九十三卷極矣  
小說昉自燕丹東方朔郭憲浸盛至洪邁夷堅志四  
百二十多卷極矣類書昉自皇覽歐陽虞氏浸盛至  
孟利貞碧玉芳林四千五十卷極矣

孟書舊唐志作四百五十為近今從通  
志然三教珠英全時亦一十三百也

凡道家之書始於周盛於漢極於晉唐凡釋氏之書始

於漢盛於梁極於隋唐而皆少殺于宋之南渡而釋氏之教復極盛於元道亦庶焉至明又皆左次矣劉歆七畧無所謂釋氏王儉任昉釋典皆自為類阮孝緒七錄亦另錄釋道二家隋志畧同惟新唐志附子家未通考因之蓋以道家本列九流釋典不宜更出余意二藏篇帙既多且本方外之說分門另錄似無不可第如唐志通考亦未為不宜也

舊唐書釋典不錄

唐開元中道藏共三千七百四十四卷其後殘缺宋王

欽若等刊補洞真部六百二十卷洞元部一千一十三卷洞神部一百七十二卷太真部一千四百七卷  
太平部一百九十二卷太清部五百七十六卷正一部三百七十卷凡四千三百五十卷

七部三百一十一帙

釋藏唐開元中五千四十八卷嗣後屢增幾千餘卷陸子淵謂今藏不應尚仍舊數蓋其間或有所裒益也然以西天經目較之才千百之一耳第隋志六千餘卷今反數減於前足徵釋教盛於六朝至唐宋間禪

說勝而經典稍左次矣

二藏余所無僅單行釋道書數千卷因通  
考例附子家末子淵書目亦似未得二書

古今書籍盛衰絕不侔班氏所錄九流曰儒曰道曰墨  
曰名曰法曰雜曰農曰陰陽曰縱橫曰小說而道家  
外別出神仙房中陰陽外別出天文五行縱橫外別  
出兵家而兵家又自分四類蓋漢時數家極盛致然  
實則一也後世雜家及神仙小說日繁故神仙自與  
釋典並列小說雜家幾半九流儒道二家遞相增減

卷之二  
不失舊物兵家漸寡遂合於縱橫視舊不能十三陰  
陽與五行天文並合於伎術視舊不能什七名法間  
見一二墨遂絕矣

神仙本道家似不應別出然老闢莊列皆譚理之書自  
張道陵寇謙之杜光庭輩盛演其教欲與釋藏相抗  
故以柱下為道君又創立元始天尊而姓之曰樂名  
之曰靜信亡論太始以前即漢秦間姓名絕少此類蓋  
魏晉六朝假託宛然今讀度人大洞靈寶太清等經

大槩規模釋氏之形骸以誕誑流俗玄旨眇論邈如  
也道德沖虛南華而外言煉養服食黃庭參同足充  
案祖他如稚川貞白尚難盡信況謙之光庭輩耶  
為典章經制之學者唐杜氏宋鄭氏元馬氏三書皆與  
經史相出入非他類書比也然通典僅唐以前未為  
詳備通志殊有絕到而持論過當力不副言通考既  
該且覈規模意制足稱完書而挂漏出入時或不免  
世代遠涉獵廣良未易也作者固自苦心

鄭藝文畧外另有圖譜一略蓋因王儉七志而廣之其  
論亦精到可喜謂隋家書籍富於古今而圖譜無所  
係遂至蕩然圖譜自難傳非以無所係也宋世一二  
尚存今漫無可考矣馬氏通考以譜錄入子類圖存  
者間亦係焉似未為不可也

鄭漁仲誚班孟堅漢武以前盡竊司馬遷書不以為慚  
此不足為班病子長於左傳國策固有全錄舊文者  
要在各成厥體耳鄭作通志禮畧全襲通典藝文略



率本唐書亦以來後人之訛第中間考索精到處真有漢唐議論未及者不可誣也

通考譏漁仲鈔謄杜氏原書而唐中葉後事不復增入按宋初李宗諤等嘗奉旨續此書二百卷起唐至德止周顯德末通志尚有此目今不傳杜鄭馬三書或以列典故類然音韻經籍等皆類書也通典鄭以入類書馬以入

典故  
陳全

鄭漁仲於文史考校最精經籍畧後別著校讐畧一卷

皆前人未發後學當熟參者然其失往往多自蹈之  
如詩集類崔曙以盛唐置之晚唐許渾以晚唐置初  
唐此例不一又段成式酉陽雜俎有玉格一卷所記  
鬼神祥異而類之譜錄中蓋以為品玉之書元撰樹  
萱錄一卷入草木類蓋以為種樹之書皆可絕倒其  
過在槩錄前志原文不復精挾故兩端臨通考雖多  
襲晁陳而持論折衷咸自中的間有重出或類例未  
精然大體得之篇首會萃諸錄統論尤詳密可喜也

晏子墨之宗也而劉氏七略列於儒之首董子儒之傑也而鄭氏通志列於墨之終皆類例之大病也又通志有崔光百國詩四十三卷檢光傳乃知光答李彪百三郡國詩國為一卷通志書名卷數皆誤此或因仍前史然光傳失考亦鄭之疎也

鄭又有羣書會記三十六卷今不傳陳振孫云會記大畧世間所有之書非必盡出其家余以為或即藝文畧草本則宋世亦未必皆有也如子書儒家一類唐

志僅存曾子子思公孫尼而通志仍有宓子等可見  
阮氏古今書錄記漢藝文志書五百九十六家僅四十  
四家存據今傳漢以前書大約五十餘家然鵲冠子  
等後世偽為撰雜其中不下十餘則所存之數政與  
阮合蓋漢以前書盡喪於東京之末梁後未嘗亡也  
阮錄又有後漢藝文志目若干卷第云八十七家亡而  
不著存數按范志無藝文一類蓋謝承書也晉中經  
簿一千百十九家僅七百六十家存亡三之一至宋

以後書不紀亡數蓋世近大槩存也

凡書唐以前皆為卷軸蓋今所謂一卷即古之一軸至  
裝輯成帙疑皆出於雕板之後然六朝已有之阮孝  
緒七錄大抵五卷以上為一帙前代書帙之製僅此  
足徵因錄於左雖頗無關涉亦博雅所必知也

經典錄

七百二十帙

紀傳錄

二千二百四十八帙

子兵錄

五百五十三帙

佛法

錄

四百五十九帙

文集錄

一千三百七十五帙

伎術錄

六百六十六帙

仙道錄

二千

五百九十五帙

共八千五百五十六帙四萬四千五百餘卷

阮自著書二十一帙一百八十二卷附七錄末今無一傳惜其用力之勤并識此餘見隋志詳具弘明集中

文字集畧正史刪繁高隱傳古今世代錄雜文聲緯并諸序錄序例共七種合所編七錄共八種

宋王堯臣崇文總目今世當有傳本余求之尚未獲第觀黃長睿辨駁一十七條如張萬福中唐名將陸修靜東晉高流德山青原冢嫡臨濟全時皆灼灼世人覩記總目至謂不詳何人又以文選李善註在五臣後其疎淺不學幾於王侍書題閣帖矣然長睿所駁

亦有可議葛仙公道家舊稱葛玄非稚川明甚黃正  
駁之可也乃自狐疑其說豈二子稱謂尚未洞然耶  
謂蔡融來鵬皆唐人見丹陽集按二子俱晚唐人融  
集見通志略鵬集今世尚傳丹陽集殷璠所輯一十  
八人皆盛唐高岑先後編次之時二子蓋未生也長  
睿書家者流詩人譜系故非所悉第茲僅數十條耳  
餘考證碑帖甚夥雖辨論多美未必一一中程也黃  
又謂鄺炎集不當置後余嘗閱鄭通志見五代有鄺

炎集一卷大謂鄭誤然漢人集中又有酈炎三卷或  
五代姓名同者不可知又五代王仁裕有西江集百  
卷鄭志及通考俱不收見陸子淵外集今仁裕所著  
玉堂閒話等又間載其詩雖卑弱頗自清旨陸謂西  
江集詩萬首古今恐無此盛惟宋陸放翁亦然

書之有目體製雖全詳厥品流實分三種吳尤諸氏但  
錄一官之藏者也隋唐諸史通志一代之有者也古  
今書錄羣書會記並收往籍之遺者也薦紳雅士鳩



集以廣見聞館閣詞臣讐校以存故實目錄之纂例不可無第中秘盡籠天下之書故匪一家之力而故家上世之傳帳中之秘亦往往內府所無其目可以互稽難於偏舉鄭氏古今並載本屬大觀而讀者眩於名實代之有無家之藏畜反不可知然亦各有長也

鄭氏通志緊徵往籍而昔人著作之旨已所發明馬氏通考獨紀存書而異時闕逸之篇靡從考究且自勝

國而後未之及也余自總州之歲溺志斯途南北東西訪求餘二十載經史子集類次羸三萬編誦讀滋深犁然有會間以暇日會萃二書并四代藝文諸家目錄以及儒先月旦文士雌黃續附勝國

皇朝製作稍以已意列其指歸析類分門總為一集庶千載簡帙之廢興百氏編摩之得失一日可以盡其大都而卷軸繁猥殆至百數尚未能脫稿云

二酉山房記王長公為余藏書室作者今附錄此云余

友人胡元瑞性嗜古書籍少從其父憲使君京師君故宦薄而元瑞以嗜書故有所購訪時時乞月俸不給則脫婦簪珥而酬之又不給則解衣以繼之元瑞之橐無所不罄而獨其載書陸則惠子水則米生蓋十餘歲而盡毀其家以為書錄其餘貲以治屋而藏焉屋凡三楹上固而下隆其趾使避濕而四敞之可就日為庋二十又四高皆麗棟尺度若一所藏之書為部四其四部之一曰經為類十三為家三百七十

為卷三千六百六十二曰史為類十為家八百二十  
為卷萬一千二百四十四三曰子為類二十二為家  
一千四百五十為卷一萬二千四百四曰集為類十  
四為家一千三百四十六為卷一萬五千八十合之  
四萬二千三百八十四卷元瑞自言於他無所嗜所  
嗜獨書飢以當食渴以當飲誦之可以當韶濩覽之  
可以當夷施憂藉以釋忿藉以平病藉以起色而是  
三極者無他貯所貯亦獨書書之外一榻一几一博

山一蒲團一筆一研一丹鉛之缶而已性既畏客客亦見畏門屏之間剥啄都盡亭午深夜坐榻隱几焚香展卷就筆於研取丹鉛而讐之倦則鼓琴以抒其思如是而已故人黎惟敬以古隸扁其楣曰二酉藏書山房而屬余為之記按古所稱小酉山上石穴中有書千卷相傳秦人於此學因留之故梁湘東王文有云訪酉陽之逸興見荊州記甚詳一曰藏書之所有大酉小酉二山在楚蜀間今宣撫之所由名而設


成式之著書謂之酉陽雜俎者也惟敬之所標當亦云是余因以慨夫七雄之前盖不惟周之藏史為老聃之所掌者而名山與窟如宛委石簣禹穴洞庭之類其靈文秘檢往往有之第既為造物之所恡惜而人間之蹟困於漆書竹簡而未易廣盖自七雄而後一燼於秦火再潰于莽三焚於卓僉四燬於湘東五佚於巢六竄於宣和雖隨散隨聚而周之藏史其所餘能幾何况闡闡之淺而責之守匹夫之力而望之

致也夫以劉向之七略僅三萬六千卷任昉又減其  
三之一隋之嘉則殿名為三十七萬餘卷而正本亦  
僅三萬七千而止耳開元之際最為極盛至八萬卷  
然亦多一時之所著而宋崇文之目又減其大半後  
之益者積數十年而增募不過萬卷今元瑞以匹夫  
之致而闡闢之守僅十餘年而至四萬二千三百八  
十四卷不亦難哉雖然世有勤於聚而倦於讀者即  
所聚窮天下書猶亡聚也有侈於讀而儉於辭者即

所讀窮天下書猶亡讀也元瑞既負高世之才竭三  
餘之晷窮四部之籍以勒成乎一家之言上而皇王  
帝霸之猷賢嘉聖神之蘊下及乎九流百氏亡所不  
討覈以藏之乎名山大川間以餘力游刃發之乎詩  
若文又以紙貴乎通邑大都不脛而馳乎四裔之內  
其為力之難殆不啻有倍於前代之藏書者蓋必如  
元瑞而後可謂之聚如元瑞而後可謂之讀也噫元  
瑞於書聚而讀之幾盡矣屠龍之伎殫而世亦無所



用子矣盡亦舍而從我遊乎玉京人烏須彌之頂有  
祖龍之火不能燔而仲尼之博姑存之弗論者吾將  
發其一二以窺子焉即二酉之藏與子讀於二酉之  
所得皆糟粕矣弇州老友王世貞撰



少室山房筆叢卷二

欽定四庫全書

子部

少室山房筆叢卷

三四

詳校官中書<sub>臣</sub>吳璫

員外郎<sub>臣</sub>牛稔文覆勘

總校官知縣<sub>臣</sub>繆琪

校對官中書<sub>臣</sub>李斯咏

謄錄監生<sub>臣</sub>姜士安

欽定四庫全書

少室山房筆叢卷三

明 胡應麟 撰

經籍會通三

古書歷世兵革存更間有殘編裂簡僅以空名寓於載籍緝錄之家存而不論博雅之流論而不議釣奇之士顧有取焉編摩之暇辨駁誣謬聯絡遺亡與癖古者共之述遺軼第三

甚矣秦火之烈也。皇王帝霸之道，聖神賢哲之謨，蕩為烟埃。所存，占卜術數而已。漢興，六藝始出於屋壁，冢墓之中。劉向父子掇拾七略，孔氏之外，無復他編。其餘儒墨、兵農、班史、藝文所志，大抵春秋戰國之作。夏商以前，僅數十種，率皆誕幻，不經當時具悉。其偽今俱摘錄，類列篇中，即不耳目。其書大都可槩見矣。至於占卜術數，動稱黃農以上，反闕秦漢之文。蓋以嬴焰所遺，故盛相依託，其為誣矯，尤不可言。世所洞曉。

不復贅疣云

班藝文志所錄次序頗淆今稍據時代列之漢以兵取天下故論兵書特盛楊僕任宏所輯一百八十二家固取不過數十家其目尚多依託自餘可知

神農二十篇

農家

又兵法一篇

兵家

黃帝十六篇

兵家

又經四

篇又銘六篇又君臣十篇又禡五十八篇

俱道家

又說

四十篇

小說家

蚩尤二篇

兵形勢家

太乙兵法一篇天乙兵

法三十五篇封胡五篇風后十三篇力牧十五篇鳩

治子一篇鬼容區三篇

俱兵陰陽

大禹二十七篇

農家

天乙

三篇

謂即成湯非前太乙也小說家

務成子十一篇

小說家

伊尹五十一

篇

道家又二十七篇小說家

辛甲二十九篇鬻熊二十二篇

太公二百三十七篇

俱道家

尹佚二篇

墨家

師曠八篇甚

弘十五篇

俱兵陰陽家

孔甲盤盂二十六篇

雜家

凡依託不經之甚者莫如黃帝三王房中二十卷堯舜

房中二十三卷湯盤庚房中二十卷皆極野俚褻誕

可誅班氏自謂芟除猥雜猥雜孰加此者筆之正

史何也第劉氏亦不應收

醫方等錄雖亦稱述黃岐然文字古奧語致玄眇蓋周秦之際上士哲人之作其徒欲以驚世竊附黃岐耳今醫方但知內經等考班志有黃帝外經十八卷又扁鵲有內經九卷外經十二卷或即難經也三皇惟伏羲差免誣讎而亦有按摩一家大是笑資

王伯厚困學紀聞云漢初去古未遠帝王遺書猶有存者賈誼書修政語引黃帝曰道若川谷之水其出無



已其行無止顓頊曰至道不可過也至義不可易也  
功莫美於去惡而為善罪莫大於去善而為惡故非  
吾善善而已也善緣善也非吾惡惡而已也惡緣惡  
也吾日慎一日帝嚳曰緣巧者之事而學為巧行仁  
者之操而與為仁也故節仁之器以修其材而身專  
其美矣德莫高於博愛人政莫高於博利人故政莫  
大於信治莫大於仁吾慎此而已矣帝堯曰吾存心  
於先古

凡十餘語多  
與史記同不錄

帝舜曰吾盡吾敬而以事吾上

故見謂忠焉吾盡吾敬以接吾敵故見謂信焉吾盡  
吾敬以使吾下故見謂仁焉吾取之以敬也得之以敬  
也大禹諸侯會則問於諸侯曰諸侯以寡人為驕乎  
朔日朝則問於士曰大夫以寡人為汰乎又曰民無  
食也則我弗能使也功成而不利於民我弗能勸也  
湯曰學聖王之道者其辟如日靜思而獨居其譬若  
火含學聖之道而靜思獨居其譬若去日之明於庭  
而就火之光於室也可以小見而不可以大知得賢

而舉之得賢而與之其譬若登山乎得不肖而舉之  
得不肖而與之其譬若下淵乎是以君子慎其與而聖  
主慎其舉又曰藥食嘗於卑然後至於貴藥言獻於  
貴然後聞於卑求道者不以目而以心取道者不以  
目而以耳致道者以言入道者以忠積道者以信樹  
道者以人又引周文王武王問鬻子武王問王子旦  
師尚父淮南人間訓引堯戒曰戰戰栗栗日慎一日  
人莫蹟於山而蹟於埵此帝王大訓之存於漢者若

高帝能除挾書之律蕭相能收博士之書則倚相所  
讀者必不墜矣幸而緒言尚在知者鮮焉好古之士  
尚其盡心於斯按紀聞所載今見賈誼新書中意古  
必尚有其書紀錄帝王格言者或散見雜家如嚮子  
之類今其名不可得矣

紀聞又云漢七略所錄若齊論之問王知道孟子之外書四  
篇今皆亡傳莊子逸篇十有九淮南鴻烈多襲其語唐世  
司馬彪注猶存後漢書文選世說注藝文類聚太平御覽

間見之斷圭碎璧足為匣櫝之珍博識君子或有取焉  
六經之後擬作者世但知揚王一二然不止是也書亡  
逸故後無述焉今稍類列於篇

擬易者揚雄太玄經關朗洞極真經衛元嵩元包張志  
和太易張弧素履子司馬光潛虛又楊泉太玄經

擬書者孔衍漢尚書後漢尚書魏尚書王通續書陳正

卿續尚書

漢至唐  
十二世

崔良佐尚書演範宋韓氏續尚書

擬詩者束皙補亡王通續詩

擬春秋者王通元經之類

擬論語者揚雄法言張融家語梁武帝孔子正言王通  
中說王勃次論語宋薛據孔子集語蓋亦正言之類  
擬孝經者馬融忠經徐浩廣孝經張上儒演孝經

兵書往往有擬六經者郭良輔有武孝經員半千有臨  
戎孝經無名氏有兵春秋兵家論語農家又有賈充  
道大農孝經又劉炫酒孝經皆濫襲聖典可罪也

職官類又有宋百官春秋五卷王道秀百官春秋五十

卷無名氏百官春秋二十卷蓋皆紀傳之屬又包譜  
河洛春秋李荃閫外春秋俱非編年體其他效編年  
者詳見下條考其義例如王仲淹元經鄭如幾魏春  
秋皆以魏為統聖人誅叛臣攘夷狄之義安在哉

六經惟春秋續述尤盛李繁戰國春秋二十卷趙曄吳  
越春秋十二卷皇甫遵吳越春秋傳十卷楊方吳越  
春秋削繁五卷孔衍春秋國語十卷春秋後國語十  
卷劉允濟魯後春秋十卷何承天春秋前傳十卷春

秋後傳三十卷春秋雜語十卷陸賈楚漢春秋九  
卷司馬彪九州春秋十卷劉孝標九州春秋抄一卷  
胡旦漢春秋一百卷漢春秋問荅一卷袁曄漢獻春  
秋十卷孔衍後漢春秋六卷孔舒元漢魏春秋九卷  
孫盛魏氏春秋二十五卷孫壽魏陽秋異同八卷習  
鑿齒漢晉陽秋五十四卷孫盛晉陽秋三十卷檀道  
鸞續晉陽秋二十卷杜延壽晉春秋略二十卷崔鴻  
十六國春秋一百二十卷十六國春秋略二卷蕭方



三十國春秋三十卷三十國春秋鈔二卷武敏之三  
十國春秋一百卷皇甫謐玄晏春秋三卷王琰宋春  
秋二十卷魏衡卿宋春秋二十卷吳均齊春秋三十  
卷臧嚴棲鳳春秋五卷蔡允恭後梁春秋十卷吳兢  
唐春秋三十卷韋述唐春秋二十卷陸長源唐春秋  
六十卷尹洙五代春秋一卷總之皆漢紀唐歷之類  
今傳者百無一二而偏記小史若越絕陽說等書輒  
十傳六七聖神經典即其名不易當如此況其實哉

又如晏子春秋虞氏春秋呂氏春秋李氏春秋之類今  
惟晏呂氏傳蓋子書雜家非紀載褒貶也虞李二書  
當亦此類至如杜嵩有任子春秋辛邕之有博揚春  
秋俱俳諧文葛立方韻語陽秋是詩話明崔氏文苑  
春秋是文選竝取義而已

六朝人樓鳳春秋蓋以配  
獲麟可笑宋史無玄晏春

秋而有皇甫

帝王世紀

曹大家有女孝經宋尚宮有女論語今傳女孝經乃唐  
人借名大家然前志竝有曹書今亡逸矣

孔鮒有小爾雅劉伯莊有續爾雅張揖有廣雅曹憲有  
博雅李商隱有蜀爾雅羌爾雅陸佃有埤雅羅願有  
爾雅翼林慎思有續孟馮休有刪孟劉軻陸筠並有  
翼孟司馬光有疑孟余允文有尊孟辨陳方之有削  
荀吳申有非荀劉李二爾雅今不傳蓋宋末已亡疑  
孟尊孟二書見朱文公集餘並未覩

二荀亦亡又宋  
人有蕃爾雅

陸賈有新語顧譚亦有新語賈誼有新書虞喜亦有新  
書桓譚有新論夏侯湛華譚劉晝各有新論崔寔有

政論王肅亦有政論仲長統有昌言王滂亦有昌言

賈山有至言崔靈亦有至言六朝好學漢類如此

仲尼諸弟子著述傳於漢者漆雕子十三篇

漆雕開之後七略至

通志皆全元龜以即開著誤也

王史氏二十一篇

六國時人

羊子十八篇

名嬰齊人羊姓音彌

皆七十子之後也

世子十六篇

名碩陳人

李克七篇

子夏弟子

景子十三篇

密子弟子

公

孫尼子二十八篇皆七十子之徒也

受業仲尼者曾子外宓子十六篇宋景濂諸子辨有言

子二卷宋以前目錄皆無元王燾哀集遺言為此書

然猶勝偽撰者余近得顏子三卷亦國朝人哀集雖

謂有功聖門可也

孟子史稱七篇明甚而漢志十一篇蓋七字誤分為二也

吾夫子世以文事顯而漢高世夢侯聚特以軍功封

以經術傳而漢武世太常臧特以詞賦著

太常有賦家十篇

二十

篇

先孔氏而著書者黃帝史孔甲盤孟二十六篇漢志居

雜家首非陳孔甲也陳博士鮒亦名甲故孔叢子後

出宋人以即黃帝孔甲而又謂一名盤孟蓋盤孟宋世已亡而編目者誤記漢書有此因附會也唐志無孔叢子景濂太史以注者宋咸所纂大槩得之

吾夫子裔傳尚書者安國注尚書者穎達然梁孔衍有漢尚書魏尚書則續書不始文中子也

衍所著又有春秋數種夫

子二十四世孫也

戰國諸子往往有姓存名缺者西京諸子又往往有名在姓亡者今皆不可考因錄左方該洽之士或旁參

曲証得其姓名以慰作者則不啻遇之旦暮矣

景子三篇

儒家兵家又十三篇

羊子四篇

儒家

侔子一篇

全上

宮孫子二篇

道家

鄭公九篇

名家

吳子一篇

雜家

尹都尉十四篇

農家

王氏六篇

全上

李子十篇

丁子一篇

鮑子十篇

苗子五篇

魏氏六篇

以上俱兵家

白氏三十八篇

醫家

臣彭四篇

儒家

郎中嬰齊十二篇

秦零陵令信一篇

伯象先生一篇

臣說三篇

又賦九篇

臣賢一篇

以上雜家

臣饒二十五篇

臣安成一篇

臣壽七篇

以上小說家

倅一篇

兵家

臣吾十八篇

孺子冰四篇

臣昌市六篇

臣義二篇

俱詞賦家

臣瓚

見漢書注



先秦兩漢間子書名全者甚衆蓋皆以姓為稱故爾然其書傳者甚希又非文義所急故往往知其一不知其二雖博雅之士或知其二未必知其三四也今據劉氏七略鄭氏通志及御覽元龜等類書條載十數類於左自備忘忽云爾非示諸大方也

兩孟子

一鄒人孟軻

七篇

一陰陽家

一篇

又易孟氏

十一篇

兩荀子

一趙人荀況

三十篇

一荀悅申鑒亦號荀子

兩董子

一戰國董無心

一篇

一漢董仲舒

百二十篇

三賈子

一賈誼

五十八篇

一賈山

八篇

唐藍田尉賈某撰見通志一志

兩莊子

一莊周

五十二篇

一莊助

四篇

又莊安

一篇

兩景子

一宓子弟子

三篇

一兵家

十三篇

五孫子

一道家

十六篇

一孫武

八十二篇

一孫臏

八十九篇

一孫

軫

九篇

又晉孫綽

十卷

二吳子

一吳起

四十八篇

一雜家

一篇

四李子

一李克

七篇

一李恢

三十三篇

一李良

三篇

一兵家

十篇

二商子

一商鞅

二十九篇

一商子逸書亦號商子

四鄒子

一鄒衍

四十九篇  
五十六篇

一鄒爽

十二篇

一鄒陽

七篇

二田子

一田駢

二十五篇

一田俅

三篇

二鬻子

一道家

二十一  
二篇

一小說

十九篇俱稱熊  
未必一人也

兩兒子

一兒寬

九篇  
儒家

一兒良

一篇  
兵家

兩劉子

一劉敬

三篇  
儒家

一梁劉勰

三卷

二桓子

一桓寬

六十篇  
鹽鐵論

一桓譚新論

十七卷

二蘇子

一蘇秦

縱橫三十一篇  
兵家十一篇

一蘇彥

晉參軍見  
通志道家

二張子

一張儀

十篇  
縱橫

一張蒼

十六篇  
陰陽家

二韓子

一韓非

五十五篇

一韓信

三篇兵權謀家

二徐子

一儒家

四十二篇宋人

一徐樂

一篇

二墨子

一墨家

十五卷翟

一兵家

班志所省卷數未詳

二毛公

一毛萇

詩訓故三十卷

一道家

九篇即趙隱博徒者

七公孫子一公孫尼一公孫固一公孫弘一公孫龍一

公孫發一公孫渾邪又汲冢有公孫段

二王孫子一王孫巧心

一篇儒家

一兵形勢家

十六篇

二容成子一陰陽家

十四篇

一房中

二十卷

二鵬冠子一道家

一篇 一兵家 任宏所錄 班氏省之

三務成子一小說

十一篇 一五行 十四卷 一房中 三十卷

二尉繚子一雜家

三十九篇 一兵家 三十篇

二淮南子一雜家

五十四篇 一兵家 班氏艾自容成 至此疑皆一人

二平原君一儒家

七篇 漢朱建撰 一戰國 趙公子勝

二太玄經一揚雄

十九篇 一揚泉撰 見唐書及通志略隋藝文志作太元經

先秦子書之名有甚奇怪者其書什九不傳因錄此為

好事談柄後世以奇怪稱者間附焉

我子一篇

墨家

處子九篇

趙人法家

世子二十二篇

儒家

兒子一篇

名良兵家

蜎子十三篇

名淵楚人道家

尸子二十篇

名佼商鞅師雜家

闕子一篇

縱橫家梁武帝補闕子當補此

捷子二篇

齊人道家

楚子三篇

道家

宋子十八篇

小說家

芊子十八篇

儒家

髮子

見楊用修集

朝子

見御覽又經子見意林

蹇子

道家見藝文略

少子

齊張融道家

臣君子二篇

蜀人道家

將詎子五篇

陰陽家  
六國

國筮子十七篇

兵陰  
陽家

乘丘子五篇

陰陽家  
六國人

宮孫子二篇

道家

長盧子九篇

道家  
楚人

鳩治子一篇

兵陰  
陽家

游棣子一篇

法家

鄭長者一篇

道家  
六國  
時鄭人

衛侯官十二篇

陰陽  
家

杜文公五篇

陰陽  
家

魁紀公三十卷

唐樊  
宗師

猗玗子三卷

雜家  
元  
結撰

炙轂子五卷

唐王  
叔

墨希子

唐徐靈  
府道家

甘驥子

唐溫庭筠  
小說家

幽求子二十卷

杜夷  
道家

贅隅子

宋王  
晞

史記處子作劇子捷子作接子弭子作吁子蜎淵作環

淵并識

庾仲容子鈔今世不傳僅馬總意林行世按宋晁氏讀書志凡百七家三卷余所得本卷五而所引僅六十餘家蓋又亡其半矣其書多裁割前人言語洪景盧據所引疑古孟子與今不全非也按景盧稱世不傳書三十餘家今意林亦僅存半其書名則諸史藝文



諸家目錄往往可徵因錄景廬語而考列其下作者大都亦因槩見云

容齋隨筆云唐世未知尊孟子故意林亦列其書而有  
差不同者如伊尹不以一介與人亦不取一介於人  
之類其他所引書如胡非子隨巢子纏子王孫子公  
孫尼子阮子正部姚信士緯殷興通語牟子周生烈  
子秦菁子梅子任奕子魏朗子唐滂子鄒子孫氏成  
敗志蔣子譙子鍾子張儼默記裴氏新書袁準正書

袁子正論蘇子陸子張顯析言于子顧子諸葛子陳子要言符子諸書今皆不傳於世亦有不知其名者

矣

考見  
下條

隨巢子六篇胡非子三篇竝見漢藝文志注皆云墨翟弟子也纏子不載漢志而意林引用二條皆與董無心論難語無心戰國人著書闢墨子纏子蓋亦戰國墨之徒也王孫子一篇見漢志儒家注名巧心劉勰雕龍末所稱王孫巧心即此公孫尼七十子門人其

書兩見漢志一儒家二十八篇一雜家一篇今意林  
所引但有公孫文子而無公孫尼不知其儒家雜家  
也阮子正部政論魏清河太守阮武撰姚信書名士  
緯梁人信又有新書二卷竝見鄭氏通志藝文略阮  
法家姚名家也通語十卷晉尚書左丞殷興撰正部  
論八卷後漢侍中王逸撰竝見隋志儒家注中凡注皆梁  
時目錄有者隋世已亡故因類附之牟子二卷後漢太尉牟融撰鄭志  
全列儒家今載弘明集者非也周生烈魏人三國志

有傳隋志作周生子要論亦見儒家

潛夫論注中

秦子三

卷吳泰著撰見隋志雜家

傅子注中

梅子一卷中言阮步

兵意林以為晉人或近之隋志作梅子新論

附桓譚下

魏

朗三卷後漢會稽人見隋志儒家唐子十卷吳唐滂

撰見隋志道家鄒子漢志有三戰國衍爽漢鄒陽據

意林所引百餘言不類戰國或當是陽書也孫氏成

敗志三卷吳孫毓撰見隋志

儒家正論下

蔣子者魏蔣濟

萬機論八卷見雜家譙子者蜀譙周法訓八卷見儒

家鍾會芻蕘論五卷

附蔣濟萬機論下

默記三卷吳大鴻臚

張儼撰新言五卷吳大鴻臚裴元撰析言論三十卷

晉議郎張顯撰並見隋志雜家

傅子注下

顯又有古今訓十

二卷亦見雜家正論十九卷正書二十五卷竝袁準

撰見儒家蘇子者七卷晉征北參軍蘇彥撰陸子者

十卷晉清河守陸雲撰竝附道家

唐湯子下

然雜家又有

蘇道立言六卷陸澄政論十三卷不知意林所引果

道家雜家也干子十八卷晉干寶撰顧子十卷晉揚

州主簿顧夷撰竝附見儒家

志林下

然吳太常顧譚有

新語十二卷亦稱顧子諸葛子五卷吳太傅諸葛恪

撰見雜家然儒家又有武侯集誠二卷亦諸葛也陳

子要言十二卷吳豫章太守陳融撰見法家符子二

十卷東晉員外郎符朗撰見道家惟任奕子未得考

而道家有魏河東太守任嘏撰道論十二卷或字之訛

也

漢志外竝見隋志  
唐史鄭志俱全

按景盧謂諸書今皆不傳於世此殊失考諸書非至宋始

不傳自隋世已湮沒考隋經籍志洪所列三十餘家  
存者惟魏朗唐滂蔣濟譙周袁準符朗顧譚任嘏十  
餘家隋巢一卷胡非公孫尼亦各一卷蓋不過十之  
三自餘皆梁世所有隋一不存修史者附見其目列  
注自明鄭漁仲一槩鈔入不復辨其有亡大誤後與  
若馬氏意林所錄自是從仲容子鈔纂出諸子本書  
雖亡其引用千子鈔者唐世故在洪雅名博洽然於  
諸史藝文志不甚究心故有此誤政與論太平御覽

書目同科

今意林六十家洪所列外尚有一二僻者化清經十卷  
蔡洪撰篤論四卷杜恕撰物理論十六卷楊泉撰竝  
隋世已亡附見諸子注中又體論四卷亦杜恕撰傳  
子百二十卷傅玄撰竝隋世尚存者此外有湘東王  
鴻烈十卷楊偉桑丘先生書二卷陸澄缺文十三卷  
張顯古今訓十一卷盧辯稱謂五卷桓子一卷何子  
五卷郭子三卷隋世或存或亡今率湮沒無考大抵



唐以前子書僻者略盡此矣

藝文志儒家有董無心一卷注稱難墨子歷朝諸志咸  
有其目宋吳秘嘗為注釋見通考晁氏所紀蓋南渡  
尚存而今不甚傳其言行亦不少槩觀獨馬總意林  
引纏子云纏子修墨子之業以教於世儒有董無心  
者其言修而謬其行缺一字而庸言謬則難通行庸則  
無主欲事纏子纏子曰文言華世不中利民傾危繳  
繞之辭者竝不為墨子所修勸善無愛子重之右皆

纏子中語蓋二人同時纏墨者饒董自尊其教固不足憑余獨慨夫戰國之世釐翟之教大行聲稱積漸至與儒竝以莊周之恣橫其敘道術特冠墨於諸家之首而三致意焉自餘咸可例見無心生戰國世獨奮然起闢之計其度越當時詎在漢世仲舒之下蓋孟子與氏後一人而已而後之儒者絕口不道其功鄭漁仲精覈藝文至謂無心為墨氏弟子寃哉余曷能弗詳為辯也

班氏藝文於戰國諸子亦有不能盡錄者如墨家無纏  
子而見於意林蓋或出於後世而實戰國之書非偽  
撰也第今亦亡從考矣

原夫藝文之為志也雖義例仍乎前史實紀述咸本當  
時往代之書存沒非此無以考今代之蓄多寡非此  
無以徵故魏晉迭興盛衰迴絕齊梁接踵貯積懸殊  
且前人製作世日以寡後人著述世日以增遍讀歷  
朝諸志卷軸簡編靡有同者粵自晉唐而下懿君賢

弼亡弗究心考文大典意在斯乎劉知幾史通以為  
附贅懸疣雷同一律而大譏隋史之非此疎鹵之譚  
匪綜核之論即後漢一書藝文無志而東京一代典  
籍茫然他可槩矣

劉史通論史諸體甚衆獨論表  
志甚疎鄭漁仲所以譏范曄也

甚矣前代之留神典籍也華嶠漢書軼矣然隋得一十  
七卷存焉唐得三十一卷存焉即殘闕僻緩之書弗  
忍棄也隋十七卷蓋重購所致唐顧偓之則承平日  
久屋壁之下岩石之中有時而出也蕭子雲晉書一

百二卷至唐僅得九卷王智深宋書六十一卷至唐  
僅三十卷干寶晉書止二十卷朱鳳晉書止十四卷  
皆不知原數實則散逸亡緒鳳則編輯未成亦錄之  
弗忍棄也前代于典籍如此後世非直殘缺者不可  
得見即全帙以飽蠹魚可勝嘆哉

陸子淵云宋王景文有詩總聞嘗借鈔於李伯華家其  
說詩頗與文公異按景文名質蘇子瞻全時人而此  
書端臨通考亦載第卷數不同恐贗作也

一友人云嘉靖中籍沒分宜有晏元獻集一部二十餘帙鈔本也主其事者亦博雅之士當時深欲借鈔慮生謗議遂止余聞深為惜之因記里中有元人育嬰圖摹本載元獻跋語幾七百言其文甚莊雅而書法殊有晉唐風世但名元獻詩詞罕知其文翰者

張文潛柯山集一百卷余所得卷僅十三蓋鈔合類書以刻非其舊也余嘗於臨安僻巷中見鈔本書一十六帙閱之乃文潛集卷數正全書紙半已漶滅而印

記奇古裝飾都雅蓋必名流所藏子孫以鬻市人余目之驚喜時方報謁臬長不持一錢顧奚囊有綠羅二匹代羔鴈者私計不足償并解所衣烏絲直綴青蜀錦半臂罄歸之其人亦苦於書之不售得直慨然適官中以他事勾喚因約明旦余返寓通夕不寐黎明不巾櫛訪之則夜來鄰火延燒此書倏煨燼矣余大悵惋彌月因識此冀博雅君子共訪或更遇云

南渡以還書多端臨通考所未載者余所見小說家如

西溪叢語癸辛雜識等不下數十種蓋馬氏所據大率本晁陳二家自餘宋末諸人所著或未及行世通考雖成於元世其時兵革動勦無緣掇拾今承平日久故漸出人間不得以為偽也

永樂中命胡廣王洪等輯大典二萬二千八百七十七卷一萬一千九十五冊目錄六十卷其表文載蟬精集中蓋古今創見書也惜卷帙繁重未傳云

見七脩類稿



少室山房筆叢卷三